

Annertuumik innarluutillit ikiorserneqartarnerat pillugu Inatsisartut peqqussutaata allanngortinneqarnera pillugu Inatsisartut peqquussutaat (Innarluutilinnik isumaginninnerup kommuninut nuunneqarnera)

§ 1

Annertuumik innarluutillit ikiorserneqartarnerat pillugu Inatsisartut peqqussutaat nr. 7, 3. november 1994-imeersumi, Inatsisartut peqqussutaat nr. 12, 5. december 2008-meersukkut kingullermik allanngortinneqartumi annertuumik innarluutillit ikiorserneqartarnerat pillugu Inatsisartut peqqussutaanni makku allannguutigitinneqassapput:

1. § 2 imatut oqaasertalerneqassaaq:

”§ 2. Kommunalbestyrelsip qinnuteqarneratigut Naalakkersuisut akuerisinnaavaat ikiorsiissutit allat, matumani misileraalluni aaqquissuussinerit aamma annertuumik innarluutilinnut isumaginninnermi perorsaanikkut neqeroorutit immikkut ittut ilanngullugit eqqarsaatigalugit, pilersinneqarnissaat.
Imm. 2. Ikiorsiissutit imm. 1-imi taaneqartut Naalakkersuisunit nakkutigineqassapput.”

2. § 7 imatut oqaasertalerneqassaaq:

”§ 7. Suut ikiorsiissutigineqarsinnaanerat kommunalbestyrelsip aalajangissavaa.

Imm. 2. Kommunalbestyrelsip assersuutigalugu makku aalajangersinnaavai:

- 1) iluaqusersuutininik pissarsinissamut ikiorsiineq,
- 2) tapersersortitut ikiortinik atorfinitsitsinissamut ikiorsiineq,
- 3) angajoqqaat allalluunniit innarluutillip angerlarsimaffimmi ulluinnarni paaqqutarineqarneranik suliaqartut sulinermikkut ikiorserneqarnermikkullu oqilisaavigineqarnerat,
- 4) siunnersortimik ikiorteqarnermut ikiorsiineq,
- 5) innarluutillip inigisaata allanngortinneqarneranut aaqquissuunneqarneranullu ikiorsiineq,
- 6) qanigisat allallu ilinniartinneqarnerinut, pikkorissartinneqarnerinut il.il. ikiorsiineq, taamaaliornikkut innarluutillip ulluinnarni inuunerata oqinnerulerlunilu pitsaanerulernissaa anguniarlugu,
- 7) najugaqatigiiffinnik nakkutigineqarlunilu najugaqarfinnik pilersitsinermut ikiorsiineq,
- 8) ulloq unnuarlul paaqqinnittarfimmiinneq pillugu naalakkersuisunut inassuteqaat, ajornanngippat Kalaallit Nunaanni,
- 9) innarluutillip angerlarsimaffimmi avataani paaqqinnittarfimmiinneranut atasumik innarluutillip akiliunneqarluni tikeraartinneqarnera imaluunniit feriartinneqarnera, imaluunniit immikkut pisoqartillugu qanigisaasut akiliunneqarlutik feriartinneqarnerat.

10) atuartuunerup naareernerani iliuusissanut pilersaarusioneq.

Imm. 3. Kalaallit Nunaanni ulloq unnuarlu paaqqinnittarfinnut inissiiffissaqavinngippat, ulloq unnuarlu paaqqinnittarfinnut ineqarfinnulluunniit assingusunut Kalaallit Nunaata avataaniittunut inissiinissaq Naalakkersuisut akuersissutigisinnaavaat.”

3. § 8, imm. 3 imatut oqaasertalerneqassaaq:

”Imm. 3. Pissutsit immikkut ittut pisariaqalersippassuk, kommunalbestyrelsi annertuumik innarluutilinnut biiliniq ataatsimut angallassisarnermik aaqqissuussisinnaavoq.”

4. § 10, imm. 3 imatut oqaasertalerneqassaaq:

”Imm. 3. Naalakkersuisut kommunalbestyrelsi najugaqatigiiffinnik nakkutigineqarlunilu najugaqarfinnik pilersitseqqullugu peqqusinnaavaat.”

5. § 11 imatut oqaasertalerneqassaaq:

”§ 11. Najugaqatigiiffiit ataasiakkaat tunaartarisassaat kommunalbestyrelsip akuerisassavai, tak. imm, 4.

Imm. 2. Kommunallbestyrelsi najugaqatigiiffinnut perorsaanikkut ilitersuisassaaq.

Imm. 3. Najugaqatigiiffiit ataasiakkaat ingerlanneqarnerisa perorsaanerisalu malittarisassanik tunaartarisassanillu atuuttunik malinninnerat kommunalbestyrelsip nakkutigissavaa.

Imm.4. Najugaqatigiiffinni najugaqartussanik tiguisarnermi, aqutsinermi, ingerlatsinermi, aaqqissuussinermi perorsaanikkullu sulinermi tunngaviusumik malittarisassat Naalakkersuisut aalajangersassavaat.”

6. § 12 imatut oqaasertalerneqassaaq:

”§ 12. Nakkutigineqarluni najugaqarfiit ataasiakkaat tunaartarisassaat kommunalbestyrelsip akuerisassavai, tak. imm, 4.

Imm. 2. Nakkutigineqarluni najugaqarfinnut perorsaanikkut kommunalbestyrelsi ilitersuisassaaq.

Imm. 3. Nakkutigineqarluni najugaqarfiit ataasiakkaat ingerlanneqarnerisa perorsaanerisalu malittarisassanik tunaartarisassanillu atuuttunik malinninnerat kommunalbestyrelsip nakkutigissavaa.

Imm.4. Nakkutigineqarluni najugaqarfinni najugaqartussanik tiguisarnermi, aqutsinermi, ingerlatsinermi, aaqqissuussinermi perorsaanikkullu sulinermi tunngaviusumik malittarisassat Naalakkersuisut aalajangersassavaat.”

7. § 13 atorunnaarsinneqarpoq.

8. § 16 kingorna ivertinneqassaaq:

”§ 16 a. Inunnut annertuumik innarluutilinnut ulloq unnuarlu paaqqinnittarfinnut inissinneqarsimasunut kommunit akiliutigisartagaat ullormut unnuamullu ataatsimut akigititaq tunngavigalugu naatsorsorneqassaaq.”

9. § 18 a atorunnaarsinneqarpoq.

10. § 19 atorunnaarsinneqarpoq.

11. § 20 imatut oqaasertalerneqassaaq:

”§ 20. Kommunallbestyrelsip peqqussut manna tunngavigalugu annertuumik innarluutillit ikiorserneqarsinnaanermut periarfissanik siunnersorlugillu ilitersussavai.

Imm. 2. Peqqussut manna tunngavigalugu qinnuteqaateqartarnek, inassuteqaateqartarnek, akuersissuteqartarnek aqutsinerlu pillugit malittarisassat Naalakkersuisut aalajangersassavaat.”

12. § 21 imatut oqaasertalerneqassaaq:

”§ 21. Annertuumik innarluutilik Kalaallit Nunaata avataani paaqqinnittarfinmiippat pineqartup kommunitut najugarivisaani kommunalbestyrelsip pineqartup Kalaallit Nunaannut uternissamut

periarfissai ukiumut ikinnerpaamik ataasiarluni misissortassavai.

Imm. 2. Angerlatsitsisarneq pillugu malittarisassat erseqqinnerusut Naalakkersuisut aalajangersassavaat.”

13. § 21-p kingornanut ivertinneqassaaq:

“**§21 a.** Inummut annertuumik innarluutilimmut ulloq unnuarlu paaqqinnittarfimmut kommunimi inissiiffiusumi kommunalbestyrelsip pissutsit inummut annertuumik innarluutilimmut atugassarititaasut nakkutigisussaavai.”

14. § 22 imatut oqaasertalerneqassaaq:

“**§ 22.** Annertuumik innarluutilik peqqussut manna tunngavigalugu ikiorserneqarsinnaanersoq kiisalu ikiorsiissutip suussusissaa annertussusissaalu kommunalbestyrelsip aalajangissavai.

Imm. 2. Peqqussummi pineqartunut kikkut ilaatinneqarnissaannik malittarisassat erseqqinnerusut Naalakkersuisut aalajangersassavaat.”

15. § 23 imatut oqaasertalerneqassaaq:

“**§ 23.** Kommunalbestyrelsip peqqussut manna tunngavigalugu ikiorserneqarnissamik qinnuteqartoq qinnuigisinnaavaa

- 1) paasissutissat pineqartup qanoq ittumik ikiorsinneqarnissaminut piginnaatitaaffigisaasa aalajangiiviginnaanut pisariaqartinneqartut pissarsiariniarneqarnerannut suleqataaqqullugu, aamma
- 2) suliap suliarineqarnerata ilaatut nakorsamit misissorteqqullugu imaluunniit misissorneqarniarluni katsorsarneqarniarlunilu uninngasussanngortitaaqqullugu.

Imm. 2. Peqqussut manna tunngavigalugu ikiorserneqarnissamik qinnuteqaatip suliarineqarneranut paasissutissat pisariaqartutut isigisariaqartut, annertuumik innarluutilik sapinngisaq naapertorlugu akuersiseqqaarlugu, annertuumik innarluutillip atugarisaanut tunngasunik ilisimasalinnit allanit imaluunniit annertuumik innarluut pillugu ilisimasalinnit kommunalbestyrelsip aammattaaq paasissutissat pissarsiariniarsinnaavai.”

16. § 24 atorunnaarsinneqarpoq.

17. § 25 imatut oqaasertalerneqassaaq:

“**§ 25.** Peqqussut manna tunngavigalugu ikiorserneqartoq pisussaaffeqarpoq kommunitut najugarivitamini kommunalbestyrelsi inuunermini atukkami allanngornerinik ikiorsiissutigineqartup tamakkiisumik ilaannakortumilluunniit allanngortinneqarneranik atorunnaarnissaanilluunniit kinguneqarsinnaasunik ilisimatissallugu.

Imm. 2. Inuk imm. 1-imi taaneqartutut paasissutissiisussaataitanerminik eqqortitsinngitsoornermigut imaluunniit ikiorserneqartusnaanani nalunngikkaluarlugu peqqussummi matumani aalajangersakkat tunngavigalugit ikiorsiissutinik tiguisimappat ikiorsiissutigineqarsimasut utertillugit akileqqunissaat piumasaqaatigineqarsinnaavoq.

Imm. 3. Tunniunneqarsimasunik imm. 2 tunngavigalugu tiguneqarsimasunik utertitsilluni akiliisarneq pillugu malittarisassat Naalakkersuisut aalajangersarsinnaavaat.”

18. § 25-p kingornanut ikkunneqassaaq:

“**§ 25 a.** Kommunalbestyrelsi pisussaataitaavoq kisitsisitigut paasissutissat il.il. Naalakkersuisut qinnutigisaasa nassiunnissaannut.

Imm. 2. Naalakkersuisut kisitsisitigut paasissutissat il.il. annertussusissaat pillugu malittarisassanik aalajangersaasinnaapput, takuuk imm. 1, aamma taakku qanoq nutarterneqartassanersut nassiunneqartassanersullu.”

19. § 26 imatut oqaasertalerneqassaaq:

”§ 26. Peqqussut manna tunngavigalugu aningaasartuutit, kommunalbestyrelsimit akilerneqartassapput.

Stk. 2. Inunnut annertuumik inaarluutilinnut ulloq unnuarlu paaqqinnittarfiliornermut Naalakkersuisut tapiissuteqarsinnaapput.”

20. § 27, imm. 2 atorunnaarsinneqarpoq.

21. § 28 atorunnaarsinneqarpoq.

§ 2

Inatsisartut peqqussutaat atuutilissaaq 1. januar 2011.

Kalaallit Nunaanni Namminersorlutik Oqartussat, 31. maj 2010

Kuupik Kleist

/

Maliina Abelsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut